



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym

tiryimym@aolima

tir yimym

TAPAK 3

**Taoba Bangladesh ato kilonser
Hasina anema ken o benok**

**Adani-Hindenburg ken o: Cong-i Aug 22
nü linük ajunga nung longkak aittsü**

VOL. XXI ISSUE NO. 302 (ADOK 302) DIMAPUR RASEMNÜ (WEDNESDAY) LUROI (AUGUST) 14, 2024 ₹ 5.00

Police aser advocate tsüingda syndicate lir: KBA

Dimapur, August 13, 2024 (TYO): Nagaland nung advocates aser police tsüingda özüingi memelaba tesentaktep aliba ajanga temeten agütsüba maparen, bushisüingdang aser ken o angadanga nung tetsükdaktsü ajurur ta Kohima Bar Association (KBA)-i tai tongloktsüogo.

Advocates aser police tesentaktep aliba ajanga tai tongloktsürtem aser parnok kibong/kinungertem i Constitution of India nung Arrla 22 alema renema aliba advocates amshitsüsa akümer. Arrla 22 ajanga tai tonglokja alir aser par kibong/kinungertem i parnoki mulungba advocate ka shimtsü temeten agütsür. Talisa Legal Services Authorities Act, 1987 ajanga pei sasa advocate anepalu mesüteter asoshi lateta lir, ta KBA-i ashi.

"Ken o nung tai tonglokja alirtem pur police station mesüra jail-i anir arur aser idangji bangdak police/jail ketdangsurtemi parnoki ashiba advocate nem bail mapa inyakdaksür. Police stations/jail nung parnoki shimtetba advocates indang Vakalatnamas mesüra phone number yua lir aser tai tongloktsür nem iba kasa

advocate shimdaksür. Iba inyakym nung advocate jagi police den jelia jembitepa ayuba ama fee nungi shilem agütsür" ta KBA-i sangdong ka nung ashi.

Police aser advocates tsüingda tim masüba syndicate ayuba ya tai tonglokja alir dang nungi tashiyim agi sen meshia agitsü atema lir ta parnokisa ashi.

Iba ajanga bushisüingdanga, ken o angadanga aser temeten agütsüba inyakym nung kongshir aser police o advocate akhüm melidaksür ta KBA-isa ashi.

Iba ama mapa ya Prevention of Corruption Act, 1988 aser Nagaland (Discipline and Appeal) Rules, 1967 kübok temerenshi lir. Ano bangdak advocate temjia Advocates Act, 1961 kübok disciplinary proceedings agitsü lenmang lir ta parnoki nishia ashi.

Kohima Bar Association-i iba onük ya Director General of Police (DGP), Nagaland dangi benogo aser pa dang tim masü mapa inyakba ketdangsurtem anema mapa inyaksü shiogo.

KBA-isa iba mapa inyakba member-advocates dang joko meinyaksü shiogo. Parnokisa nübortem dang ibala mesükba inyakym meteta lira parnok nem osang sangoktsütsü ayongzükogo.

PM Modi-i Nagaland nungi nisung 3 jaok

Dimapur, August 13, 2024 (TYO): Prime Minister Narendra Modi-i Nagaland nungi aspirational block programme nung beneficiary asem New Delhi nung Independence Day benjungmong nung adentsü jaokogo.

Par asem den kinungtsü/kinungbo 78 buba Independence Day benjungmong nung alakteta jaokertem ama shilem agitsü.

Nagaland nungi beneficiary asem ya Renung, Kughalu K aser AP Tsupan nung lir aser parnoki tansütsüsa lenisüba aser entrepreneurship inyakba atema PM Modi-i jaok.

Renung aser lar Self Help Group 'Limreh' ya Kiphire district kübok Kiusam block nungi lir. Parnoki aspirational district programme ajanga tajangzük nguogo aser ibaji Kiusam yimtsüing nung weaving and tailoring centre ka amenokba lir.

Iba mapatong ajanga yimdak tetsürtem nem training agütsür aser süoshi ayokba ajanga senotsü aazükür.

MGNREGA scheme nung beneficiary ka ama Emlomi nungi Kughalu K-i par yimtsüing renlokba nung tongti shilem agiogo. Pa ya Zunheboto district kübok Akuhaito aspirational block nungi lir.

Kughalu ya tang Akuhaito Village Development Board Association general secretary inyaker.

Noklak district kübok Thonoknyu aspirational block nungi AP Tsupan ya PM KISAN Scheme beneficiary ka lir. Iba scheme ajanga pa aluyimba nung teyari agütsüogo. Tsupan-i 1997 nungi Thonoknyu yimtsüing nung aluyima arur.

2019 nungi Agriculture Department ajanga PM KISAN flagship scheme inyakba kübok Tsupan-i perilla seeds, soybeans aser oilseed ayimer.

Thonoknyu yimtsüing nungi PM KISAN scheme ajanga tajangzük tulutiba angubaji foxtail millet lir.

Parnok ya Krishi Vigyan Kendra Kiphire nungi Senior scientist Dr Lahar Jyoti Borodoloi-i Nodal Officer ama meina aotsü

Health department-i Dengue atema metetdaksür

Dimapur, August 13, 2024 (TYO): Nagaland Health and Family Welfare Directorate-i Dengue shirang anepaluyim aser noktangsü atema teinyaksü kar metetdaksüogo.

Nübortem tzu peria ajemtsü, anisüingzüktsüla aser mozü achitsüla aser teponü, teni, natzü mesüra scü nung azü alura doctor bushitsüla ta National Vector Borne Disease Control Program-i metetdaksü.

Parnokisa pei sasa Ibuprofen, Aspirin aser Naproxen sodium mozütem machitsüla kechiyong iba ajanga azü teimba ayimtsü akok ta metetdaksüogo.

Nübortem Rapid Diagnostic Tests nung kümdangtsüla kechiyong ibala teset ajanga 'false positives' adoktsü akok. Anungji Naga Hospital Authority Kohima aser District Hospital Dimapur amala hospitals nung oa tendangtsüla ta Directorate-isa ashi.

Nagaland nung HIV Ambassadors (RRC Agents) shim



Kohima Zone atema RRC Youth Convention 2024 nung NSACS project director Dr. Ahu Sekhose aser tangartem i HIV Ambassadors den külemi agiba noksa angur.

Kohima, August 13, 2024 (TYO): Nagaland State AIDS Control Society (NSACS)-i ayonga agiba Intensified IEC Campaign nung shilem ka ama tanü Red Ribbon Club (RRC) Youth Convention 2024 agiogo.

Mongulbarnü Capital Convention Centre, Kohima nung agiba sentong ya Kohima Zone (Kohima, Tseminyu, Wokha, Mokokchung, Zunheboto, Kiphire & Phek district tem) atema lir.

Iba sentong nung Nagaland nung HIV and AIDS Ambassadors aden aser NSACS project director Dr. Ahu Sekhose-i district tenet nungi HIV Ambassadors (RRC Agents) shim.

Sentong nung Nagaland Baptist Church Council (NBCC) Youth Secretary Rev. N. Suhuto Chishi-i "Faith Based Organization (FBO)" indang onük jemi.

"Laishiba nung tenzüksü, kümzüksü aser meimtsü tetuyuba agütsüba ama NBCC-i HIV & AIDS anema mapa inyaker aser anepalua arur. 2002 nungi NBCC-i HIV & AIDS noktangsü aser menatepba samatsütsü atema mapa tenzük inyaker" ta Rev. Chishi-i ashi.

NBCC nung Nagaland

Development Outreach (NDO) ajanga HIV Project tenzük arogotem nung ajungshia mapa balala inyaker aser HIV and AIDS anema inyakba mapa nung tongti shilem agir ta paisa ashi.

2004 nungi NDO-i arogo lennirtem nem training & seminars, advocacy workshops, awareness programs, trainers training aser resourceful materials agütsür. NDO-i LFA den yaritepa HIV & AIDS indang kaket ana adokogo, ta Rev. Chishi-isa ashi.

NBCC-isa 2007 nung HIV & AIDS atema Policy ka yangluogo aser iba atema mapa inyaker. Kümtem süia arudang NBCC-i Legislator's Forum on AIDS (LFA) den tesentaktep yanglu aser iba ya Nagaland nung HIV & AIDS anema inyakba mapa nung mera tulu ka liasü ta paisa metetdaksü.

"Asenok teinyaksü aika lir aser nükjidong matong tashi metoktsütsü. PLHWA nunger bendanga mamshitsü aser senzükä mayutsü atema akokba tashi onoki merangtsü" ta Rev. Chishi-isa ashi.

"Tanü putu nung HIV ya lanurtem dak kanga putetbabo mali saka lanurtem iba nungi jenbua malio ta asenoki angatetsüla. Asenoki HIV osang

meteta alitsüla aser tangar danga iba osang ashitsüla" ta Naga Students' Federation (NSF) speaker Katho P. Awomi-i "Role of youth in HIV prevention" onük jembidang ashi.

Lanurtemi dang tarutsü putu yangertetsü anungji asenoki ola adoktsü tim aser asen lokti ajungmesotsüla. Asenok külemi longjemer inyakra temelenshi bener arutetsü aser HIV samatsütsü, ta Awomi-i ashi.

Joint Director, BSD, NSACS Dr. Nukshisangla Jamir-i "HIV Professional; Treatment & prevention" onük jembidang lanurtem dang temang tiptema ayutsü aser medemer o kidangertema ajungmesotsü ayongzük.

HIV ya HIV tashidak adokdaksüba virus lir aser anepalu mesüi toktsüra AIDS akümtsü. ARTCs-i free HIV treatment den medical, psychosocial aser programmatic services agütsür. ARTCs nungsa TB atema screening (cough, fever, night sweats, weight loss) asür, ta Dr. Nukshisangla-i ashi.

Arishi küm 15-24 tsüingda alirtemi HIV menatsü tezüpa aser iba ya osang tejangja memetetba, tendangba aser medemertem rongshiba ajanga lir, ta laisa ashi.

ENPO aser MHA committee tsüingda tejak shiyutepogo



Dimapur, August 13, 2024 (TYO): Eastern Nagaland People's Organization (ENPO) President A Chingmak Chang aser taoba President R Tsapikiu Sangtam nati anir Ministry of Home Affairs den ENPO ketdangpur tasentem tejak shiyutepba senden ka menogo.

Iba senden ya BSF Patgaon, Azara, Guwahati nung AK.

Mishra aser Rajesh Kamble nati aniba luden den amen.

Senden nung Frontier Nagaland Territory (FNT) indang onük den iba mapa indang action plan benoka lemsatop ta osang angazükür.

Iba atema ano teinyaksü kar lir anungi maneni asüingdangyateptsü ta ludeni ENPO dang ashi. Tanü senden

nungsa ENPO aser ENLU tsüingda working draft paper atema ratatepba jangatepogo ta osang angazükür.

ENPO teshimtet telok nung ENPO executives, Tribal Presidents, Frontal Organization Presidents (ENGOA, ENSF, ENWO) aser Eastern Nagaland Legislator's Union (ENLU) nungi teshimtet nübotem aden.

District Hospital Peren nung mental health training agütsü



District Hospital Peren nung August 13, 2024 nü healthcare workers atema Targeted Intervention Training on Mental Health sentong ayongzükba nung shilem agirtem noksa nung angur.

Dimapur, Luroi/August 13 (TYO): District Hospital Peren nung August 13, 2024 nü healthcare workers atema anogo ka Targeted Intervention Training on Mental Health sentong ayongzükba liasü.

Iba training nung shisalen sayur ya Sunupienla (Psychiatric Social Worker, DMHP) aser Temsurenla Aier (Asst. Professor Northeast Christian University, Dimapur) liasü.

Iba training mezüing session nung Sunupienla-i NMHP tenzükaba aser district balala nung DMHP mapa kuma inyakba indang jembia liasü, aser asen state nung mental health sector tsütsü nübu aser talisa Psychiatric Doctors agi antünga lir ta ashi.

Lai mental health kodang tongtipang, mental health nung kongshiba yimyatem aser healthcare worker ka ama mental health tebilemstütem jangjatetsü indang rateta ashi.

Laisa mental health & illness indang meshidak angatetba jembia liasü.

Nüburtemi tang tashi mental illness ya temenen tanüla agi adokdaksür ama züingshir, ta lai ashi.

Sunupienla-isa Tele-MANAS toll free number 14416 indang rateta ashi, koba ajanga nüngdabapur nem mental health services balala agütsür ta ashi.

Tanabuba session nung Temsurenla Aier-i Importance of soft skills in Mental Health,

mental health practitioner indang teinyaktsü rateta ashi.

Iba timtem ajurua alirtem mulungsentsü aser tangatetba jangja angatetsüla, ta ashi.

Tensa mejungi alidang yimya shidak amshitsü nüngdaker aser telemtetba tajung agia timtem ajurua alir ajangzüksü asoshi inyaktsüla, ta lai ashi.

Lai iba training nung adener dang item soft skills amshitsü aser anogoshi inyakyim nung amshitsü ajungshia liasü.

Iba sentong ya District Mental Health Programme (DMHP), Peren ajanga ayongzük aser CHC Jalukie aser Tening, PHC Athibung, Heningkunglwa, Dungki aser District Hospital, Peren nungi doctor aser nurse tem dena liasü.

Angami Women Organisation-i aitsür

Dimapur, Luroi/August 13 (TYO): Mokochung district kübok Saring yim nung August 10, 2024 nü NSCN (Khango) nungi 'Sergent' Moakaba-i arishi küm asem tanur ka dak tim masüba mapa inyak ta angashia süngmanger, ta Angami Women Organisation (AWO) sangdong ka ajanga ashi.

Naga lima asoshi inyaker ta jembir Naga nunger kati iba ama mapa tamajung inyakba ya meshisadanteter.

Ozüng amshir temi menua melie aibelener nem temerenshi tulutiba agütsütsü akhanger, ta AWO ajanga ashi.

NSCN (Khango) teloki

mapang shia tapi agi Ceasefire rules nung aibelenaka Ceasefire Monitoring Cell ola madokba aser mangu-memetet amai yutsüba asoshi jashir, ta sangdong ajanga ashi.

CFMC ajanga temulung agüja inyakba kuli sayua iba telok anema Ceasefire asoshi agreement zülutepba nung mela aliba mera agitsü ajungshir, ta AWO ajanga ashi.

Iba sangdong ajanga AWO-i jala aser lar kinunger den tejashi lemsateper aser Tulusang Tsüngremi parnok nem tashi agüjang ta sarasademtsür, ta sangdong ajangasa ashi.

DSO Kohima-i "Har Ghar Tiranga" rally ayongzük



Dimapur, Luroi/August 13 (TYO): Kohima indang District Sports Officer ajanga August 13, 2024 nü IG Stadium nungi High School Junction, Kohima tashi "Har Ghar Tiranga" rally ayongzükba liasü.

Iba rally ya India nüchiso ngur küm 78 ajungba nüngtem nung "Azadi Ka Amrit Mahotsav" benjongmung nung shilem ka ama ayongzükba liasü, kong kaketshir aser saisapong janrar nisung 200 dena liasü.

Pei kidang Indian National Flag (Tiranga) asongtsü nüburtem ajungmesoa linük

indang maitsü den tesendaktep adokdaksütsü nükjidong nung "Har Ghar Tiranga" campaign ya tenzük.

Linük yangerba nung nüburtemi tali bendanga agütsür inyaktsü aser National Flag indang awareness tali agütsütsü mechi iba campaign ya ayongzük, ta Zhopovi Zecho-i ashi.

"Iba campaign ya nisan sayutsü atema kisüing masü, ibai senso ajak mulungjang nung linük meimba mulungsentsü aitdaksütsü asoshi lir," ta Zecho-i sentong nung ashi.

Assam Rifles ajanga 'Breaking the Silence' campaign tenzük



Dimapur, Luroi/August 13 (TYO): Assam Rifles-i Aids Care Trust Support aser Department of Social Welfare, Nagaland den lungjemer 'Breaking The Silence' campaign tenzükba liasü, koba Nasha Mukta Bharat Abhiyan den sendaktepa lir.

Iba campaign ya mental health aser temesepba ozü achi-ajemba atema awareness agütsütsü asoshi lir, aser

International Youth Day nüngtem nung August 12, 2024 nü semzükba liasü.

Iba sentong nung Major General Manish Kumar, Sena Medal (Bar), Inspector General Assam Rifles (North) dena liasü.

Sentong nung Kenei Ritse, Miss Northeast 2023, aser Hikali Achumi, Miss Nagaland 2022 nungeri shilem agia tayongzükba o jembia liasü.

Mental health aser temesepba mozü achi-ajemba tebilemstü atema ola madoki aliba bentetsü nükjidong nung iba campaign ya tenzük, ta parnoki ashi.

Sentong nung tongti tesemdang Major General Manish Kumar, Sena Medal (Bar), IGAR (North) ajanga iba campaign indang online sapang semzüksütsü aser mental health aser drug abuse dak sendakba tebilemstü indang rateta ashi aser lanurtem dang tongti shilem agitsü ayongzükba liasü.

Pai iba sentong ayongzük nem tenüngsang agütsü aser Nagaland, Arunachal Pradesh aser Manipur nung iba campaign yaritsü atema lungjemer nokdaksü tongtipang ta ashi.

Iba sentong nung drug abuse anema nokdaksü tenangzükba agi aser sentong ayonger nungi melepzüing o jembia sentong tembanga liasü.

DALT-i Vanaraja chicks lema agütsü



Dimapur, Luroi/August 13 (TYO): Dimapur Ao Lanur Telungjem (DAYO) Economic Resurgence Committee ajanga Indian Council of Agricultural Research (ICAR), Jharnapani, Nagaland den lungjemer August 13, 2024 nü teshimtet poultry farmers pezü nem Vanaraja chicks tejang 1200 lema agüja liasü.

Convenor, DALT Economic Resurgence Committee, Dr Michael Imchen lenisüba kübok iba maparen ya inyak aser ICAR ajanga Vanaraja chicks ya angati

agütsü, ta pai ashi. Committee-i ICAR teyari nung tarutsü anogotem nunga an chanu tali agütsütsü sentong lir, ta pai metetdaksü.

ICAR yagi Nagaland tesem ajunga nung an tajungba Vanaraja chick ajanga backyard poultry farming ajungkettsü meranger.

Yimtsüing sasep nung Vanaraja farming tenzükba rongsenketzüing tsütsü tajangzük alitsü ajungmesoa iba mapa ya inyaker.

NAGALAND POLLUTION CONTROL BOARD
 Signal Point, Dimapur - 797112, Nagaland
 Tel.: 03862-245727, TeleFax: 03862-245728
 Website: www.npcb.nagaland.gov.in e-mail: npcb2@yahoo.com

AMBIENT AIR QUALITY FOR KOHIMA AND DIMAPUR CITY
KOHIMA ASER DIMAPUR NUNG MOPUNG MERÜK-MEMERÜKBA JENJANG

Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazük alemabo metudaksütsüla"
				06.08.2024	08.08.2024	
1	Dimapur	Bank Colony	Residential	37	40	100 µg/m ³
2		Dhobinala	Commercial	53	65	
3		NPCB Office, Signal Colony	Residential	38	32	
4		Tenyiphe, Chumoukedima	Commercial	28	28	
5		Nagarjan	Residential	31	26	
6		Viola colony	Residential	19	14	
7		Burma camp	Commercial	51	73	
8	Kohima	Opposite NST Office	Residential	20	28	
9		PWD Junction	Commercial	29	38	
10		High School Junction	Commercial	47	41	
11		Midland (Upper)	Residential	21	25	

Iba osang ya nübertem ajangzüksü atema Nagaland Pollution Control Board-i agütsür.

Doctor temi longkak aitba ajanga tetsüdkaktsü adok



Kolkata nung trainee doctor ka tashiyim agi shi nung medemer tepsetba anema King George's Medical University nung doctor temi longkak aitba noksa nung angur.

New Delhi, Luroi/August 13 (Agencies): Kolkata kübok RG Kar College and Hospital nung arishi küm 31 tain trainee doctor ka tashiyim agi medemba sülen tepseta toktsüba anema Mongolbarnü linük ajunga nung longkak aiba sülen yimti balala nung mozüki nung service balala dak kongshiogo.

Iba doctor indang tasü mang ya RG Kar Hospital indang seminar hall nung Hokolbar anpedang nguteta liasü. Ken o

dak sendakba nung civic volunteer ka tenüng agi Sanjoy Roy Honibarnü puogo.

Trainee doctor ka dak shi nung tashiyim agi medema tepsetba ajanga linük ajunga nung doctor temi longkak aitba sülen OPDs aser non-emergency surgery amala service balala dak kongshiogo.

Television nung noksatem ajanga doctor temi Hombar nung longkak aitba nguogo aser iba ajanga West Bengal nung health service tem lemta

aküm. Parnoki asür nem ochi obendang agütsütsü aser security tajungba agütsütsü takhangba agüja liasü.

Federation of Resident Doctors' Association (FORDA)-i ayongzükba sülen linük kübok tesem balala nung doctor temi longkak aita arudar aser ashiba agi, ochi obendang magütsü tashi aser parnok takhangba mataloktsü tashi parnok maneni longkak aittsü.

(Maneni tapak 8 nung...)

Adani-Hindenburg ken o: Cong-i Aug 22 nü linük ajunga nung longkak aittsü

New Delhi, Luroi/August 13 (Agencies): Congress MP KC Venugopal-i ashiba agi, SEBI mendembuba mapa nungi agintsü khanga August 22 nü linük kübok state ajak nung ED office kima longkak aittsü.

Congress-i Mongolbarnü sangdong ka ajanga ashiba agi, Securities and Exchange Board of India (SEBI) tekolakba Madhabi Puri Buch, Hindenburg report nung aija aliba dak sendakba nung la mapa nungi agintsü khanga August 22 nü state ajak nung Enforcement Directorate (ED) office kima longkak aittsü.

AICC General Secretary aser MP, KC Venugopal-i ashiba agi, August 22 nü longkak aitba mapang longkak aitersemi state yimtiba ajak nung Enforcement Directorate Office tem

longbanger takhangba mataloktsü tashi longkak aittsü.

"Tanü Congress tir Mallikarjun Kharge lenisüba nung AICC General Secretary, Incharge aser PCC tirtem senden ka menogo. Linük nung tang ataloka aliba ochi mashi ken o tulutiba (Hindenburg revelations) ka indang sensaksemogo, koba Adani aser SEBI dak sendakba lir," ta pai ashi.

Iba ochi mashi inyakyim nung Ato Kilonser Narendra Modi densema lir ta shia Congress MP yagi, "onoki onük ana atema takhangba agütsütsü asoshi linük ajunga nung longkak aittsü telemetba agiogo, kong Ato Kilonser densema aliba Adani ochi mashi ken o dak sendakba nung JPC inquiry ka agitsü asoshi akhangtsüba densema lir," ta ashi.

Congress tir Mallikarjun Kharge-i ayongzüka Mongolbarnü agiba senden nung caste census atema akhangtsüba onük, Wayanad nung anentsüh lendong ya national disaster ka ama sangdongdaktsütsü aser Himachal Pradesh aser northeastern state tem nung tzümetsüng amala lendong balala atalokba indang sensaksema liasü.

August 10 nü Hindenburg Research ajanga SEBI mendembula Madhabi Puri Buch aser la kinungbo Dhaval Buch na, Adani money siphoning scandal nung amshiba offshore funds nung stake aliba metetdakja liasü.

Buch aser la kinungbo nati iba taitsüba ya tamendakdak mali ta shiogo.

J&K nung bendanger kirlongrar 3 tepset

New Delhi, Luroi/August 13 (Agencies): Jammu and Kashmir Police-i Gandoh nung bendanger kiralongrar asem tepsetogo aser tawa Doda, Udhampur, aser Kathua nung kiralongrar inyakyim balala achaayangba terrorist module ka nguteta liasü.

Iba tesem nung tawa kiralongrar inyakyim balala tali küma aoba dak sendakba nung iba module ya sendaka alitsü ta amanger, ta J&K Police-i ashi.

Iba module lenir ya Mohd Lateef (Haji Lateef) ta jangjaogo aser Akhter Ali, Saddam, Kushal, Noorani, Maqbool, Liaquat, Kasim Din, aser Khadim nunger densema tanga züngsem ti tsükchir agents ama puogo, ta J&K Police-isa kasa sangdong ajanga metetdaktsü.

Tarutsü nung kiralongrar tem linüki aitba nokdangtsü aser iba tesem

tekümzükba kübok toktsütsü atema module indang network ketdangsürtemi maneni bushisüngdang südar.

J&K Police-i ashiba agi, Samba-Kathua sector ajanga bendanger kiralongrar tem India-i aitba sülen parnok agizükba nung iba module lenir aser arrtsü adener terrorist handlers temi tongtöbang shilem agia liasü.

Iba module yagi kiralongrar tem nem tejenokdak, chiyongtsü aser logistics agütsüba den Udhampur, Kathua, aser Doda districts tri-junction tonga anir oja liasü

Iba module indang züngsemtemi, Gandoh nung kasetba kiralongrar asem yagi parnok jenoktsü aser m e m e t e t d a k t s ü i senzügenpongsü atema iba module indang teyari agia liasü, ta nangzükogo, ta J&K Police-isa metetdaktsü.



Har Ghar Tiranga campaign kübok Patna nung rally ka ayongzüka agiba mapang Patna Legislative Assembly Speaker Nand Kishore Yadav, state BJP tir Dilip Kumar Jaiswal aser party MP Ravi Shankar Prasad nungeri shilem agiba noksa nung angur.

SAMAR 2 air defence system tendangtsü India renema lir

Sulur Airbase, Luroi/August 13 (Agencies): SAMAR 2 (surface-to-air missile for assured retaliation) ta nüngja agütsür kidang yangluba air defence system tasen ka tendangtsü atema India renema lir. Iba air defence system indang range ya 30 km lir, ta iba project dak sendaka aliba Indian Air Force (IAF) ketdangsür kati Mongolbarnü ashi.

"Mezüngbuba firing trials December ita agitsü," ta ketdangsür yagisa shisem. IAF-i, industry partner ana den longjemer iba air defence system ya yangluogo.

Iba weapon system indang mezüngbuba variant, SAMAR 1 IAF nung induct süogo aser iba system indang range ji 8 km lir. System anaprongla nung Russia nung yangluba air-to-air missiles amshir. SAMAR 1 nung R-73E amshir aser variant tasenba nung R-27 missile amshitsü.

IAF-i, tang agia aliba Tarang Shakti 2024 exercise mapang International Defence Aviation Exposition nung SAMAR 1 air defence system sayaogo. Tarang Shakti 2024 exercise ya India-i ayongzükba multilateral air combat drills tulutiba lir. Iba exercise nung bendanger air force teri shilem agidar aser linük 18 observers ama shilem agidar.

SAMAR system yagi fighter jets, helicopters, aser unmanned aerial vehicles tem densema anüng ajanga yokba injang balala raksatsütetsü, ta ketdangsürtemi metetdaktsü.

India-isa ano Defence Research and Development Organisation (DRDO) indang Project Kusha kübok indigenous long-range surface-to-air missile system ka yangludat. Iba surface-to-air missile inang range ya 350 km asütsü aser küm pezü pongu ka tsüngda nungbo deploy asütsü imlar.

DRDO-isa, Indigenous very short-range air defence system (VSHORADS) ka yangluogo. Iba ya man-portable air defence system ka lir aser iba yagi short range tem nung low-altitude ajanga amokmerentem nokdangtetsü.

Tang service nung aliba system tem rongnung S-400 air defence missile system aser Israel den sentepa yangluba medium-range surface-to-air missile (MRSAM) densema lir. Maneni India ket nung Israeli SpyDer, Soviet nung yangluba Pechora, OSA-AK, Tunguska, Strela aser Shilka system tem, Zu-23-2B anti-aircraft guns, upgraded L-70 anti-aircraft guns (Swedish arms firm Bofors AB-i yangluba), aser Iгла MANPADS (man-portable air defence system) nunger lir.



New Delhi kübok Bhalswa tesem nung MDC-i demolition drive ka ayongzüka agiba nokdangtsü asoshi iba tesem nung alirtem bulldozer ka anasa adenshir aliba noksa nung angur.



TIR YIMYIM

YIMOBILEM (EDITORIAL)

DIMAPUR RASEMNÜ, AUGUST (LUROI) 14, 2024

Assam aser Tripura ama mekümünür

- P Tiamongba Aier

Bangladesh nung Sheikh Hasina-i aniba Awami League sorkar atsüngdokba sülen tensa mesüngjemteti arur aser asenoki social media sabang aika nung noksa aser video balala nung Bangladesh nunger India-i arutsü merangba nguogo. August 5, 2024 nü Sheikh Hasina-i Prime Minister menden toktsür India nung arua jenokba anogo nungi India-i Bangladesh den arrtsütepa aliba tesemtem nung security akangshiogo. Talisa Northeast nung kija aser lokti tentet balalai Bangladesh nungi özüng alema arurtem noktangtsü atema sorkar dang shiogo. Kechiba Bangladesh tensa atema Northeast nung lisopurtemi tebilemtsü abener ta süra Assam aser Tripura state ama mekümünüba agi ola adoker aser Bangladesh nunger özüng alema aruba magizüker. British India mapang nungi Bangladesh nungi nisungtem Northeast India tesem nung arua alitsü tenzük. Iba sülen 1947 nung East Pakistan akümdang aser 1971 nung Bangladesh akümdang Bangladesh nunger aika India nung arua jenoka ali. Hindu Bangladeshi nunger aika West Bengal, Assam aser Tripura nung arua jenok aser tanü iba ajanga lisopurtemi timtem jenti ajurur. India aser Bangladesh tsüngda kilometre 4,096 agi arrtsütepa lir aser Border Security Force (BSF)-i anükyonga nisungtem miima arrtsü adena India telungi aiter. West Bengal nung 2,216.7 km, Tripura nung 856 km, Meghalaya nung 443 km, Mizoram nung 318 km aser Assam nung 262 km. Northeast India kübok state balala nung özüng alema arurtem khuret tulutibaji Assam nung ajurua lir. Tang tashi özüng alema arurtem indang nütsüng yongsük tejangja bendenteta mali saka Assam nütsüng yongsük crore 2.66 nungi Illegal Bangladeshi migrants (IBIs) 4,235,124 liasü ta asadangteta lir. Iba ya 2001 census nung asadangba lir anungji iba sülen tang tashi nung Assam nung IBIs kwi ka kümer alitsü aser idak nung jagi Nagaland-ia kwi ka arur alitsü? Iba jagiang taoba hopta Assam Chief Minister Himanta Biswa Sarma-ia Assam nung district karbo 'Mini Bangladesh' mesüka lir ta jembiogo. Putu 20 buba tetenzüklen Tripura nung chuba yimli alidang Muslim aser Hindu Bengali nunger aika arua alitsü tenzük. Iba sülen 1970s nung Kaptai hydroelectric dam yangluba aser 1980s nung Chittagong Hill Tracts nung kin o kin mepetmesü adoka raradang Bangladesh nung Chakma aser Hajong nunger aika Tripura nung arua jenoka ali aser tanübo lisopur dang nungi bendangertem ang nütsüng teimba kümer lir. Iba jagiang Tripura nung lisopurtemi political party balala tenteta iba khuret atema inyaka arur saka tanü tashi parnoki bilemba ama takok menguteti lir. Tripura nung chuba jabaso Pradyot Bikram Manikya Deb Barma-i anir Tipra Motha telok ajanga lisopurtem temeten atema inyaka arudar. "1991 nung Arunachal Pradesh nütsüng yongsük 8, 64,558 aliba 2011 tashi nung 13, 82,611 aküm. 1991 nung Manipur nung nütsüng yongsük 1,837,149 aliba 2011 nung 2,388,634 liasü, Meghalaya nung 17, 74,778 nungi 29, 64,007 aser Mizoram nung 689,756 aliba 2011 nung 1,091,014 liasü. Iba mapang Northeast state tem nung rongnung nütsüng teimtiba renlokbaji Nagaland nung liasü aser 1991 küm 12, 09,546 aliba nungi 2011 tashi nung 19, 80,602 renlok aser item ajanga Northeast India state balala nung Bangladeshi migrants ajanga nütsüng yongsük melenshiba sayur." Iba ya Dr. Piyali Dutta-i 2022 küm "Issue of Migration and Refugees between India and Bangladesh: The Problem, its magnitude and Implications" paper züluba nungi agitetba lir. Bangladesh nunger özüng alema arua India nung aliba ya Northeast India atema tebilemtsü khuret tulu ka lir. Iba khuret atema India-i Bangladesh den bilateral agreement ka agitsüla aser iba nung linük anaprongi pei pei sensotem pei pei linüki meyipa anir aotsü mulungteptsüla. Iba ya mapa küma inyaksü atema Northeast nung lisopur teloktem longjemer Centre sorkar rongshitsü tim. Külen, Nagaland sorkari anir kin hohotem aser teloktemi iba khuret ya ulura ta angateta teinyaksütem inyaksüla. Nagaland-i Assam den arrtsütepa aliba tesemtem nung tsümartem akangakanga mita anüksüla aser nungdakra iba atema Nagaland Police battalion tasen ka amenoktsü lenmang-a lir. Tatemsa, NSF-i anir kaketshirtem telok balalai Naga nunger tarutsü atema bilema iba tebilemtsü koktettsü atema mera kar agitsü mapang tongja tongogo.

OLEMSABANG

KIPOK TESAYUBA BULUA ALIDAK TEKÜMZÜKLIR

~ L. Kika Pongener.

(Yashi adok nungi...)

Ano shirnoki Tsüngrem pelatsüsa, Tsüngrem mulung achitsüsa indang-indanga, ochishia yimden, arogo aser lokti tenzük, parnok chirnur aser semchi-semnurji Tsüngremi balaka moatsütsü aser ajungkettsü. Ajisuka, shirnok dak ochi aser teindang shisatsü mali, saka linuk, yimden, arogo aser loktiliba raksatsü asoshi shisatsü tamajung agutsür, tamajung sentong tapu-tapu atonger, külak-küponga tashiyim mapa inyaker, parnok chirnur/semchi-semnurji alimai metettsüsa/tushitsüsa, mesura yimten, arogo, loktiliba nung nuburi aka-ana ta sukshitsüsa/züngshitsüsa mesotettsü/madoktsü. Aji oda, nisungibo memetettsü akok, tenungsanga magutsütsü akok, züngoka malitsü akok, saka shirnoki pei lima meima mapa tajung inyaker, nubur tsüngda nung yimjung apula-a mapa inyaker, linuk/yimtsüng raksaa/lemsaa aliba nungsen-nungmen metsübui tongti shilem agia yimjung yanglur, parnok dak jakzükba chirnur/semchi-semnurji Tsüngremi balaka moatsütsü aser ajungkettsü.

Tanü asen Naga nunger nuchiso bushiba mapa nunga tanü tashi nukjidong metongteti lir. Ashiko, iba ya-a kipok sayu-bentsü bulua makaba aser shisa tajung agutsür agi anungkongba ajanga asütsü akok. Tesasatsü-ka, tanü asen Naga nunger tema/telung ajunga nung telongjem mali telemsatep aser tsükchitepba agi sunga lir. Talisa, linuk tenzükertem telok balala lemsar obang mapu, nukjidong balala asüba agi tanü tashi nujiso mapa ya nukjidong metongteter sudi, Anungji ibaji ka küma longjemdaktsütsü asoshi kipok sayu-bentsü aser shisa tajung agutsütsü kanga nungdaka lir. Aji oda, iba mapa nungji kin shia nung 'Hoho' lenirtem, yimden yimsusur, arogo/mungdang lenir-i nungsen arema, mapang endok mesasai, pei pei kin linuk tenzük nem shisa tajung agutsütsüla. Surabangla, kipok sayu-bentsü, shisa tajung agutsürji shirnok shilem asütsü...??? Arogo aser mungdang nung tenzükertem, Reverends, Theologians, Scholars, Politicians, Bureaucrats, Senior Citizens, Watsü mungdang, Lanur Telongjem, kaketshirtem, aser mulongtet telok ajungai longjemer tongti shilem agia inyaksüla.

Tesasatsü-ka, tanü asen lima nung Tsüngrem tenzük, putir, laishir aikati tasü-ita ochi jembitsü tsübur, mesura tashi-tawar, tata-tainer, rongsen akar dak tsükdaker...Ochi tang ochi-a ta...Tiyazü tang tiazü-a ta tasü-ita meshiteter...Meshitak-a ta metetsümongaka, yamaibo meinyaksüla ta songtemtsü melena züzüa toktsüba agi, mangatettertemi tashiyim mapa inyaksü marentaki temulung ulua inyaker. Ano kanga tesasatsü kaji, nuburi kipok sayu-bentsü ashitsü imla-a aliba, shisa tajung agutsütsü imla-a aliba, lenirtemi meshitaka ta metet-aka, nungsen tsübuba agi ola madoki repranga toktsüba ajanga tanü asen yimden, arogo, loktiliba ajunga shiranger. Ano talisa, mungdang aser arogo lenirtemi anemsu agi tajung dang agir, saka nungsen maginuba agi ochi ashitsü tsübur, Putir o mejembir, ibajagi tanü asen lima shirang maneper. Anungji Tsüngrem tenzükertem, putir-tem, laishirtemi tasü-ita, nungsen metsübui, tanak dang tanak ta...temesung tang temesung ta...ainkar o jembitsüla. "Kong ainkar sayutsüngi mali, nubur tesoitba mali"(A.Shin-29:18). Tanü asen lima nung yimden, arogo aser loktiliba teraksa aser telemsa yanglushitsü atema kipok sayu-bentsü aser shisa tajung agutsür kanga nungdaka lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yisu aser pa nütsüngtem jajaba lenmang nung amshiba long ngutet

Luroi/August 13

(Agencies): Long atsüngba tesem tuluka ngutet ta taoba mapang osang sangdongba sülen Yisu aser pa nütsüngtem küm 2,000 jakdang jajaba lenmang yangluba nung amshiba aser Herod chuba aser pa dak nungi jakzüker temi kisü-jensüba nung amshiba long ngutet, ta Israel Antiquities Authority (IAA) ajanga ashir.

IAA ajanga sangdong ka nung ashiba agi, item long ya Jerusalem kübok Har Hotzvim kiyong nung ali tua bushiba mapang ngutet ta ashi aser Biblical Archaeology Society (BAS) ajanga August 5 nü sangdonga liasü. Iba ya iba tesem nung Second Temple period nungi ngutetba tulutiba alitsü südi ta amanger.

Long ya karbo tuozük 2.5 tons liasü aser City of David nung ali tua bushidang Pilgrimage Road nung amshia liasü. Iba lenmang ya küm 2,000 tejen lir, kong Yisu aser pa nütsüngtem jaja aser Pool of Siloam den sendaktepa lir,

kong Yisu-i nüpkoker ka anepja liasü.

Lenmang asadangba aser "geological signature" ajanga iba lenmang ya jangjateter, ta IAA ajanga ashir.

"Iba quarry nung long tulu yangluba yagi Herod chubai yimsü asü tenzüka mapang nungi 37-4 BCE tsüngta Second Temple mapang Jerusalem nung chuba indang kisü-jensüba nung amshiba ama ajiteter," ta Cherning aser iba excavation indang co-director archaeologist Lara Shilov nati Times of Israel indang sangdong ka nung ashi.

"Historical sources ajanga Jerusalem nung Herod indang kisü-jensüba project tem nung mezüngbuba Temple Mount area aser Temple ulushiba ya tongtipangtiba liasü. Iba den külemi pa yimsüsüba mapang nübürtem asoshi ki o jen tulu aika yimti ajungalen yanglu aser yangji amshitsü long tajung nüngdaka liasü. Pa sülen yimsü asür temia maneni ki o jen yanglua liasü."

Herod mapang pai ki o jen

aika yanglutsü ozüng agütsü, anungji Judean region ya yimchiyimjung kumdaktsü. Item long ya Jerusalem Temple ulushiba, Herod tasü mang rema aliba leper koba dang Herodium ta ajar aser Caesarea port city nung yangluba nung amshia alitsü südi, ta archaeologist temi ashir.

IAA excavations ajanga Herodian kibongi item long ya kong nungi bener aru, itemji metettsü, ta BAS ajanga ashi.

Tanü tashinung long atsükba tesem acre ka shi nguteta lir, saka yangji kechi miima aliar ao monguteti lir. Iba tesem ya Vitania company ajanga industrial aser commercial development atema makazüka lir, aser tang iba company yagu IAA yaria ali atur.

Tekülem ki dang masü Herod yagi long tulu amshia Jerusalem indang Temple Mount yanglu aser par semchir Herod Agrippa I ajanga long amshia Jerusalem indang "Third Wall" yanglua liasü.

ANOGO ABEN TSÜNGREM DEN

Tenüngsang Agütsüba

"Tsüngrem taochi koba Khrista Yisu nung nenok nem agütsü, aji asoshi ni nenok indang kü Tsüngrem tenüng teti asanger" (I Kor. 1:4).

Na temulung meyipba asoshi Tsüngrem nem tenüngsang agüjang. Kechiba? Kechiaser na temulung meyipbaji Tsüngremi inyakba mapa ka lir. Na nüsasa mekürnzük; saka Pai na kümzük.

Nai ibaji mapang tajung (chance) ka ama, mesüra meimlaba mapang ka nung Khristan telok ajurua, parnok den sentepi oa idakji Khrista osang tajung angashiba, mesüra kiyongeri Tsüngrem indang bilema aruba jagi na amang nung aliba nungi tesangwa dangi arua tekümtet akatsü tenüngdaktsü ta angatetdaktsür aser ya asüngdang - "Saka, Yisu kechiba ni?"

Tasen Lai nung iba tasüngdangba tesülen aser tejaklen repranga Tsüngrem temeim agi menen pur teti tatem maka taküm asoshi kümzükba tuyuba ajanga langzür, aser ibaji pai mulunga lemtetba pa nükjidong lir. Tasen Lai zülurtemi kechiba ni kümzük iba indang mashir. Saka kumzükba asoshi tenüng asangtsü atema dang ashir.

Rwanda sorkari tekülem ki 5,000 dak tema shibangtsü

Kigali, Luroi/August 13 (Agencies): Tekülem ki lapoktsü asoshi ozüng yanglua aliba ama meinyaktetba ajanga Rwanda sorkari tekülem ki 5,600 dak tema shibangtsü.

Iba tenokdangba ajanga kongsjiba tekülem ki, mosques, caves aser süki ya 2018 laws nung shia aliba 'standard requirements' matong, ta July 29 nungi hopta ana iba mapa inyaker ketdangsur temi ashi.

Iba ozüng yagi clerics tem theology degrees alitsüla aser tamangba yimsü lokti tentet sorkar nung tenüng zülüoktsüla aser pei doctrine indang kuli tejangja agütsütsüla. Item statements ya Rwanda Governance Board nung agütsütsüla, aser iba Board yagi tekülem ki aser danga civil society organizations register asür. Tekülem ki ya safety aser hygiene codes ajangtetsüla.

"Küm pongu jakdang benokba ya arogo asoshi tajung amai bilemer. Sorkari iba ozüng sülen anidaktsü küm pongu agütsü aser mapang shia onok dang nenshia ashi. Ibaji taoba küm September ta tembang," ta Anglican Archbishop Laurent Mbanda of Rwanda-i Religion News Service dang telephone ajanga ashi.

"Asenok nem mapang peria agütsüogo. Asenoki tajunglen nungi reprangtsüla."

Tazüokba makai arogo züina aoba azüoktsü mechi Rwanda Governance Board ajanga iba ozüng ya benok.

Arogo aser nübürtem



tekülem agiba tesem tajungba kumdaktsütsü asoshi item ozüng ya tajung lir, ta Mbanda-i ashi.

"Asenoki aeration, ola azüokba... tetsür aser teburtem atema metzü meshiba tesem indang jembir. Item nung dangar den kecha balaka inyaktsü mali," ta Mbanda-i ashi.

Tekülem ki shibangtsüba agi timba kongshiba ya Pentecostal arogo tilatem, mosque kar tzükum aser longpok nung lapoka alirtem lir. Item ya aika address meliasü, aser yangji tamangertem lenmang mashileni anitsü mela-melar lir ta ashir.

"Nisung timbai ya agizüker alitsü. Putir tem training alitsüla, arogo inyakyim atema yimya

shidak alitsüla, aser yamaji inyakba ajanga dang tamangba yimsü nung nükjidong aser tajangzük alitsü," ta Nairobi nung aliba Tangaza University nung Congolese Catholic priest Rev. Innocent Halerimana Maganya-i ashi.

"Tang tensa nung makamaiter tem ang tim atemer." Rwanda ya East African linük ka lir, kong nisung million 12 alir aser timba Khristanpur lir. 2022 census nung nübürtem shilem 48 shi Protestants liasü, saka single denomination tulutibaji Roman Catholic Church ya lir aser iba telok ya shilem 40 lir.

Iba linük ya US kübok Maryland state teka lir, kong

2019 küm arogo 15,000 liasü aser yangji 700 dang legally registered, ta ketdangsurtemi ashi.

1994 küm Tutsi ethnic groum timba aser moderate Hutus kar densema nisung 800,000 shi tepsetba sülen iba linük nung aliba arogo tem yagi azüdokshi mapa inyaker ta aija liasü. Tekülem ki kar nungbo nisung jenti tepset, kong civilian tem jenoka liasü. Putir aser pastor temi parnok ya tepset mesüra nisung tepseter den yaritap ta aitsü.

Mapang tatsüka lir kidanger Tanzania linük kübok Arusha yimti nung aliba International Criminal Tribunal for Rwanda nung putir kar anema meimchir

anema mapa tamajung inyak ta ken o benoka liasü.

Tang Rwanda tir aser iba mapang mitkar tanishir inyaka alisang Paul Kagame-i nisung tepsetba anendaktsüba atema tushia liasü aser pai arogo kanga kera züina aoba asoshi tebilemtsü lemsatapa liasü.

Taoba küm August ita Kagame-i Catholic pilgrims tem aputsü amokmeren aser parnoki makamait külemer ta tai tongloksü. Lanur aika mapa inyaktsü melen sarasadema tesem nung sarasadema mapang tali indoker, ta pai shia liasü.

"Nisung shingaia makamait mekülemtsüla. Yaser yamaji kodanga teinyak... Iba indang ni tanaben angashira ni trucks tem bener arua lungbanga yur tepuokdaki yoktsü aser parnok dak nungi 'poverty mentality' samaba sülen ang chioktsü," ta Catholic nung Kagame-i shia liasü.

Nisung karibo sorkari nübürtem külem-kejatsü temeden agiener ta ashir, saka putir aser ketdangsur temi ibai tamangertem kumzüka ayutsü asoshi inyaker ta ashir.

"Rwanda nung külem-kejatsü temeden lir. Ajsüüka tim masüdak arogo tenzüker. Tsüngrem melitetsüsa tekülem ki yanglua lir," ta Mbanda-i ashi.

Archbishop-isa license maliba sayutsüngir tali akumer aser kari parnok sülen anidakertem lendong aliba longpok, ayong aser arem nung anir oa sarasademer ta ashi.

AO OSHI ANGAZÜKDAK: TANÜ ANGAZÜKTSÜBA OJANG



Talepzü

(v) tipmatem (restlessness)

* Alongba ya talepzü tanur ka liasü.

Tali

(adj) onsara (more)

* Dokan puri amtsük nung sen tali meshi.

OLONG PAITEP # 6894

1			2			3			4	
			5		6		7			
8										
			9							
	10									
									11	12
			13				14			
15						16				

TIPIEN

1. Anenzükdak ki - (5)
3. Asür mangyimba - (5)
5. Temlung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temlungjang
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ___ adenshi - (4)
14. Tsünüsenbongsü adokdak - (3)

OLONG PAITEP # 6893 TELANGZÜBA

TIPIEN :

1. Kasa, 6. Rangben, 7. Mait,
9. Poktet, 11. Ati, 13. Atasa,
16. Rür, 17. Rajang, 20. Lanu,
24. Nüngjem, 25. Süra.

LANGTSÜNGLEN :

1. Khu, 2. Süjak, 3. Onük, 4. Oba,
5. Anü, 6. Ratet, 7. Mozü, 8. Ita,
10. Tar, 12. Tinu, 14. Salem,
15. Aja, 18. Anünü, 19. Taju,
21. Ano, 22. Onü, 23. Kua.

NAI-A YA METETTER MA



Kashmir kübok Baramulla nung Kashur Riwaaj festival amongdang aiür 10,000-i 'largest Kashmiri folk dance Rouf' otsü yangluogo. "Kashur Riwaaj" cultural festival ya Chinar Corps nung Dagger Division ajanga ayongzüka among. Independence Day benjungmong nung shilem ka ama Indian Army-i Baramulla District Administration aser Indrani Balan Foundation den yaritepa iba benjung ayongzük.



PROGRAMME FOR CELEBRATION OF 78th INDEPENDENCE DAY 2024 AT NAGALAND CIVIL SECRETARIAT PLAZA, KOHIMA



0600 hrs : Hoisting of National Flag in all Government Offices, Institutions/ Public & Private Buildings.

0850 hrs : Review of Parade by DGP, Nagaland.

0900 hrs : 1. Hon'ble Chief Minister arrives, hoists the National Flag, takes Rashtriya Salute and inspects the Parade.

2. Address by the Hon'ble Chief Minister.

3. Presentation of Awards.

4. March Past :

Parade Contingents:

- | | |
|---|---|
| a. 13 Assam Rifles Bn. | k. NCC |
| b. 78 th Bn. CRPF | l. Bharat Scouts & Guides |
| c. 37 th Bn. BSF | m. G. Rio School |
| d. DEF, Kohima | n. Bethel Higher Secondary School |
| e. 4 th NAP Bn | o. Government High School PWD |
| f. 10 th NAP (IR) Bn. | p. 13 Assam Rifles Pipe Band |
| g. 15 th NAP (IR) Mahila Bn. | q. Nagaland Police PTS Brass Band |
| h. Manipur Police Contingent | r. Nagaland Police 15 th NAP (IR) Mahila Pipe Band |
| i. Ex-Servicemen | s. Nagaland Police Auxiliary Brass Band |
| j. Home Guards & Civil Defence & SDRF | |

Parade Commander : **Shri Akihito Sumi**, NPS
Dy. Commandant 1st NAP

Second-in-Command : **Kum. Mhalezhunuo Chielie**, NPS
DSP (Prob) attached CMS, PHQ

5. Launch of **Chief Minister's Universal Life Insurance Scheme (CMLIS)**

6. Entertainment:

- Patriotic Dance : "Chak De India" (Kohima Orphanage and Destitute Home)
- Songs : i) "You Raise Me Up" (NSSA Music Club)
ii) "Vande Mataram" (Nagaland Madrigal Singers)

7. Cultural Presentation:

- Sakhabama Youth Organization : (Angami Tribe)
- Pfushon Zie : (Rengma Tribe)
- Surumi Cultural Society : (Sumi Tribe)
- Phusachodu Christian Youth Endeavour : (Chakhesang Tribe)
- Beru Cultural Troupe : (Yimkhiong Tribe)
- Mutao Dombu Edou : (Chang Tribe)
- Mangmetong Cultural Club : (Ao Tribe)
- Tikhir Women Union Kohima Cultural Troupe : (Tikhir Tribe)

8. The National Anthem : Government School Choir,
Deptt. of School Education

9. Distribution of Sweets at the Parade Ground : Dobashis of DC Office, Kohima

1200 hrs : 1. **Governor's "At Home"** - By invitation

2. Visit Of Institutions By Charitable Organizations

- Nagaland Adventure Club & Voluntary Blood Donors Association, Nagaland : Cradle Ridge
- Nagaland Contractor & Suppliers Union : Tabitha Enabling Academy
- Gorkha Public Panchayat, Kohima : Leprosy Hospital, Nagabazar
- Kerala Club, Kohima : Old Age Home
- Kohima Masjid Committee : Cherry Blossom
- Royal Club, Kohima : Bright Morning Star, Perieciezie
- Kohima Press Club : District T.B. Hospital, Khuzama
- Lions Club, Kohima : State Mental Health Institute
- Kohima Chamber of Commerce & Industry : Kohima Orphanage & Destitute Home
- Indian Red Cross Society, Nagaland State Branch : District Jail

Evening Programme at Nagaland Civil Secretariat Plaza

1430 hrs : Exhibition Football Match,
DGP XI Vs NFA XI

1530 hrs : Prize Distribution.

1600 hrs : Band Display

- 13 Assam Rifles Pipe Band
- Nagaland Police PTS Brass Band
- Nagaland Police 15th NAP (IR) Mahila Pipe Band
- Nagaland Police Auxiliary Brass Band

Beating of Retreat

The programme will be livestreamed at this YouTube link
<https://www.youtube.com/live/9Rm4pdVkr4g?feature=shared>

Taoba Bangladesh ato kilonser Hasina anema ken o benok

Dhaka, Luroi/August 13 (Agencies): Taoba ita linük nung kaketshirtemi longkak aitba mapang police-i nisung ka tepetba dak sendakba nung taoba Bangladesh PM Sheikh Hasina anema nisung tepsetba atema bushisüngdang ka tenzükogo.

Linük yimtiba Dhaka hopta ishika mesüngjemteti aruba sülen taoba sorkar kükok ano tanga lenir trok anema ken o benoka bushisüngdang südar.

Obendanger Mamun Mia, shibai lisopur ka asoshi iba ken o benoka liasü, pai ashiba agi, Dhaka nung court-i aija alir anema ken o benokba agizüktsü asoshi police nem tetuyuba agütsüogo. Bangladesh temzüng ozüng kükok criminal investigation nung iba ya mezüngbuba jenjang lir.

Yimden yimsüsüba tsütsü mangatetep adoka lai aniba sorkar anakshitsüba sülen taoba PM Hasina-i mapa toktsür iba ita tetenzüklen New Delhi-i jenaogo.

Hasina anema longkak aitba mapang kaketshir 400 dak tema tepsetogo. Asürtem ya timba lai tetuyuba agütsüba sülen police temi khaseta liasü.

Local aonsotsü ayoker Abu Saeed, lenmang adena aoba mapang tekolak nung injang khalokja tepsetba sülen shishilembar Amir Hamza-i July ita iba ken o benoksü atema apply süa liasü.

Pai court dang July 19 nü ashiba agi, kaketshirtem yimjung nung longkak aita aliba mapang police temi lokti dak kecha taochi makai injang khaloktsü, ta BBC Bangla

sangdong ka ajanga aser meimchir temeden anema metetdaksü.

Hamza-i ashiba agi, pa Saeed den kecha sendaktepa mali, saka ken o benoktsü atema Saeed'er kinunger ket nung senotsü mali asünung pai court den tongtepratepa liasü.

“Sheikh Hasina-i aibelenba anema temzüng ozüng dak ajemdaker jenjang agirtem rongnung ni mezüngbuba lir. Iba ken o metembang tashi ni nokdaksü,” ta pai Reuters news agency dang ashi.

Magistrate Rajesh Chowdhury-i, police dang iba ken o bushisüngdangtsü atema tetuyuba agütsüogo, koba longkak ait tenzükba sülen Hasina anema mezüngbuba ken o benokba lir.

Taoba Transport and Bridges Minister Obaidul Quader-a ken o bushisüngdang rongnung densema lir.

Hasina-i aniba sorkar yagi küm 15 tashi linük yimsüsügo

inyaksangshiba aser ochi mashi sorkar aitsür lir.

Sorkar mapa atema meden mekazüka toktsüba agintsü khanga kaketshirtemi July ita tetenzüklen nung longkak ait tenzük, saka mapang tatsüka dang lir iba longkak aitba sentong ya sorkar atsüngtoktsü atema nokdakba sentong ka aküm.

Hasina-i police tem dang longkak aiterkem tashiyim amshia azüoktsü tetuyuba agütsü aser parnok ya kaketshirtem masü saka kiralongrartem ta aja.

Nobel Peace laureate Muhammad Yunus lenisüba nung kümteba sorkar taseba nung longkak aiterkem aika densema lir.

Kasa mapang nung Hasina'er jabaso Sajeeb Wazed Joy-i ashiba agi, election agitsüba sangdongba sülen la linüki meyipa arutsü.

Office of the AKHOYATSÜR TELONGJEM DIMAPUR Konang Tetushi Agütsür

Akhoya nunger Wapong Limakumzük Jamir aser Watsü Tialila na jala Kongru Zuinla Jamir, lai Nagaland University B.ed Examination 2024 nung Top 20 nungi 17th Rank nung takok anguba asoshi Akhoyatsür ajak tenüng nung ATD ajanga jala nem konang tetushi agütsür.

Tarutsü anogotem nung la wadang tuluba aser takok nung aniangta temoatsü Tsüngrem dang sarasademer.

Sd/-
Tainla Jamir
President ATD

Sd/-
Amongla Emkong
Gen. Secretary ATD



MOLUNGNEN O



22-12-1965 - 17-07-2024

Onoki teti dang meima aliba Ojala Lt. C. Atula Lkr (Medemyim) la shirangba anogo nungi tasü nü tashi yimer yimsanger, arogotem, kidanger, kiyonger, medemerterem aser temeimbatem nenok kwi kati ojala tatempang anogo nung nübu, rongsen, shisatsü aser sarasadem ajanga yaritepogo, kinungertemi kanga pelaba lemsateper.

Onoki arua nenok ajak dang pelaba meshitetba asoshi kanga sasar, saka nenok mapa tajung onoki kodanga mamatsü. Tsüngremi nenok taküm aser kibongtem tali moajang ta ozü sarasadem.

Nü Temeim
Kinungbo, Chirur, Anükabang, aser Semchirtem



Office of the JAPUKONG SENSO SENDEN HQ. LONGCHEM DIST. MOKOKCHUNG

KHUKHUA AITSÜR

Saring yimsüng nung arishi küm pezü tanur Japukong jala dak August 10, 2024 nü NSCN (KHANGO) nung sergeant major Moakaba-i tepang agi ashitsü makokba mapa tamajung inyakba anema Japukong Senso Senden (JSS) ajanga khukhua aitsür. Meimchir takum jenjang raksaja tesüngmangtsü mapa tamajung inuakba ajanga JSS temulung kanga yiruogo aser kanga jashir aser ozüng amshir temi aibelener nem ozüng agi melaba ama tapet temerenshi agütsütsü akhanger.

Tang tensa majungba mapang timtem ajurua alir aser lar kinunger den JSS nokdaka lir aser tekeratiba nung ochi obendang angutsü asoshi onoki lenla ajak nungi yaritsü. Maneni tip matem tejashi agi sünger aliba mapang tai maket timtem ajurur alila aser lar kibong den nokdakba aser yaritepba CSOs aser NGOs ajunga dang JSS ajanga pelaba lemsateper.

(IMDONGTANGBA)
President

(S. ALEMBA LONGCHAR)
Gen Secretary



OFFICE OF THE MERANGKONG SENSO JAMIR KIDONG TELONGJEM

MERANGKONG, Pin - 798618 Dist. Mokokchung : Nagaland

TENÜNGSANG AGÜTSÜR

Merangkong Jamir Kidong Telongjem Mendenti ajanga Sangpang aser Kongro tajung shirnoki sa kakets shisa luyimba aser lenla palala nung sorkari ketdangsüa agiba tatidang nung takok tulu ngoa kidongsanger aser yimer yimsanger nem konang nüngsang tulu bener arutsü nung maneni nenok ajak nem tenüngsang aser aküm tetushi tulu akatsür.



Yashimenla



Ngopilensa



Yemnokitla



Lepzungchiba

Kr. Yashimenla
D/o. Mr. Subutemsü & Mrs. Lanurenla, Gold Medal jenjang Political Science nung St. John College Dimapur.

Sp. Ngopilensa
S/o Mr. N. Temjen Jamir & Mrs. Bendangmenla, Deputy Manager (Officer Scale-1) IBPS.

Kr. Yemnokitla
D/o Mr. N. Temjen Jamir & Mrs. Bendangmenla, G/T Maths. Deptt of School Education Nagaland Kohima.

Sp. Lepzungchiba
S/o Mr. Susunukshi & Mrs. Ozungtula, Nagaland Ecological & Sanitation Management Society Life Member. National Bee Board Category (A) Life Member.

Sp. Imtisangyu
S/o Mr. Longgerchiba Jamir & Mrs. Marmenla Imsong, NPSC/CTSE 2023 nung Junior Engineer (Class II Gazetted) Deptt of Power, Nagaland.

Sd/-
Jongpongyanger
President

Sd/-
Tiawapang
General Secretary

OFFICE OF THE NOKPU VILLAGE COUNCIL

P.O. Mangkolemba, B.P.O. Longchem Dist. : Mokokchung, Nagaland

AITSÜR

Akumen (Lirmen) nunger Asür Karlajang Aier'er jabaso Moakaba Aier, shiba NSCN (Khango) telok nung Sergeant Major lir, pai August 10, 2024 anogo nung Saringyim (Nokpu-B) yimtak mapa kangasa tamajung inyakba anema Nokpu Village Council-i kanga sashia aitsür. Iba ama tai maketba tanur küm 3 ser ita 4 tain ka dak shirurui inyak ama tama inyaksü mapa agi taküm raksatsüba osang angashia ozü yimkong aoksar aser kanga jashir. Iba ama mapa tamajung inyakba anema aitsütsübaji kecha o maka aser iba ama nisungji tangateter lokti nung alitsüsa tesem tilakata mali. Anungji, iba tatalokba maparen ya bangdak nung alirtemi shinga tsütsüa tejak mereprangi indangindanga bushisüngdangtsü mepishir aser linük temzüng ozüng nung aliba ama obendangerterem tekeratiba nung aibelener nem tesashitiba temerenshi agütsütsü onoki kanga tamang akar. Iba ama tai maketba tanur tila dak nisung meimchiri inyak memesük inyakba mapa tamajung anema tim bilemba tangateter kija aser lokti ajaki aitsütsü Nokpu Village Council-i mepishir. Iba ama mulungzürep tejashi mapang lendong aser takoksa ajurur taküm aser kinungertem asoshi onoki sarasademtsür.

(T. SUNEP LONGKUMER)
Secretary
Nokpu Village Council

(I. MEREN WALLING)
Chairman
Nokpu Village Council
Chairman
Nokpu Village Council
Dist. Mokokchung

Mokokchung nung Red Run Marathon asemogo



Dimapur, Luroi/August 13 (TYO): Nagaland AIDS control society (NSACS) tawabangba kübok District AIDS prevention & control unit (DAPCU/DISHA) Mokokchung-i ayongzüka tabuba marathon race-”RED RUN” ayongzüka agiogo.

Iba marathon asemtepba ya Red Ribbon club züngsemtem atema International Youth Day Mokokchung nung shilem ka ama ayongzüka agiogo.

Chief Medical Officer Dr Kibangkumba-i, Imlong Place nungi asemtepba tenzüksüba mapang, HIV &AIDS tashidak nokdangtsü atema ajak longjemmer inyaktsü koda

tongtibang iba indang lemsatpep. Iba marathon asemtepba ya lanurtem nem taküm libaliro tajung benshitsü, safe sexual behavior ajungkettsü aser HIV&AIDS service indang tangazükba tali agütsütsü nükjidong nung ayongzüka liasü.

Iba asemtepba nung college pezü nungi kaketshir 52-i shilem agi. Asemtepba ya Imlong place nung tenzü aser kasa tesem nung tembanga liasü, kong ADC Mokokchung Chumlamo Humtsoe-i tetsür asayartem rongnung takok angur nem aser Chief Medical Officer Dr Kibangkumba-i teburtem rongnungi takok angurtem nem sempet agüja liasü.

Takok angurtem nem kuli kaket aser senpet mezüngbuba nem sen 5000, tanabuba nem 3000 aser tasembuba nem 2000 agüja liasü. Tetsür aser tebur asemtepba nung takok angurtem district level marathon nung Mokokchung district tenüing nungi shilem agitsü.

Takok angurtem Tebur: 1ST Muchiu, 2nd Besoyemjong, 3rd Mulai. Ajak Fazl Ali College nungi.

Tetsür: 1st Imnatola Lonchar, 2nd Imchaienla Longchar tena prongla Fazl Ali College nungi aser 3rd Mucham. L Mokokchung College of Teacher Education nungi.

PFA Player of the Year atema Haaland nominate süogo

Luroi/August 13, 2024 (Agencies): Manchester City striker Erling Haaland PFA Player of the Year award atema nominate asüba sülen iba award küm anabuba atonga angutsü timla lir. Pa den külem teammate Phil Foden aser Rodri nata nominate süogo.

Haaland-i taoba season-a kanga junga asayaogo aser City pur asayamung balala nung shilem agiba mapang pai goal 38 idaktsü aser parnoki Premier League title pezübenbuba atonga bona liasü.

2022-23 season nung Manchester City puri

asayamung tongtibangtiba asemprongla akokba sülen Norway nunger asayar yagi PFA award agizüka liasü.

Kasa mapang nung taoba season City puri Premier League koka asayaba mapang Rodri ya par team asoshi tongtibang asayar ka liasü aser Spain team-i 2024 Euro akokba nunga pai tongtibang shilem agiogo.

England playmaker Foden-ia taoba season Pep Guardiola-i aniba team atema goal 27 idaktsü aser ibayongji pa-a iba award atema nominate süogo.

Chelsea forward Cole Palmer, Arsenal midfielder

Martin Odegaard aser Aston Villa striker Ollie Watkins nungera PFA Player of the Year award atema nominate süogo.

Tetsürtem rongnungi Chelsea nungi mesüra City nungi asayar kati taküm iba award angutsü.

Chelsea nungi Niamh Charles, Erin Cuthbert aser Lauren James nunger Yui Hasegawa, Lauren Hemp aser Khadija Shaw nunger den külemi nominate süogo.

August 20 nü Manchester nung PFA Awards ceremony ka ayongzüka agiba mapang takok angurtem sangdongtsü.

Ian Bell SLC batting coach kümogogo

Luroi/August 13, 2024 (Agencies): Taoba mapang England nunger batsmen Ian Bell, Sri Lankan national team batting coach asütsü shimogo. Iba osang ya Sri Lanka Cricket (SLC)-i Bodhbarnü parnok indang official website ajanga metetdaksü.

Bell shibai asaya aliba mapang Test asaya 118 nung run 7727 yanglua liasü, pai iba hopta tatemlen Sri Lanka team batting coach mapa agizüksü. SL team England den Test asaya asem asayatsü asoshi renemshiba mapang tang pa mapa nung aniokogo.

“Pa August 16 nü nungi team den inyak tenzüksü aser Test asaya asem matem tashi team den alitsü,” ta SLC-i ashiba PTI sangdong ka

ajanga metetdaksü. SLC CEO Ashley de Silva-i, “asayartem nem teyari agütsütsü atema local shisatsü aliba nisung ka anisemtsü asoshi onoki Ian shimogo,” ta ashi

“Ian-i England nung asayaba tajangshiba aika bona lir aser pai teyari agütsüba ajanga iba asayamung nung team kanga ajangzüksü ta amanger,” ta paisa ashi.

England cricket team aser Sri Lanka na August 21 nü nungi tenzüka Test asem asayatsü. Mezüngbuba Test ya Manchester nung August 21 nungi 25 nü tashi asayatsü.

Iba sülen tanabuba test asaya Lord’s Cricket Ground nung August 29 nungi September 2 nü tashi asayatsü. Tasembuba Test ya

London kübok Oval nung September 6 nungi 10 tashi asayatsü.

Ajisüaka England team captain Ben Stokes taoba Deobarnü The Hundred asayamung nung asayaba mapang hamstring yiruba ajanga tetsükdaksü adokogo.

Stokes batting amenba mapang yiru aser pa teyari agiang ground toktsür tugutet. Pa scane agiba sülen kechi timtem ali aji jangja aser iba sülen pa crutche amshia jaja liasü.

Pa ya team liromedem asoshi kanga tongtibang asayar ka lir aser pa tanepstü ngur alitsüji team asoshi kanga tongtibang lir, anungji England medical team kanga meranga inyaka alitsü.

INDIA OSANG : Tapak 3 nungi...

Doctor temi longkak aitba ajanga ...

West Bengal nung sorkar medical establishment tem nung Junior doctors, interns, aser postgraduate trainees temi aibelena alir pua obendang tapet magütsü tashi parnoki longkak aittsü ta tenangzüka agütsüogo. Kasa mapang nung West Bengal chief minister Mamata Banerjee-i, state police-i Deobarnü tashi nung ken o m e b e n t e t t e t r a bushisüngdangtsü atema agütsütsü ayongzüko.

Longkak aitba ajanga Mongolbarnü sorkar mozükitem nung out-patient departments (OPDs) nung tetsükdaksü adok, aser senior doctor temi junior doctor tem indang mapa melenzüka inyakja liasü.

Junior doctor temi tetsür doctor ka tepsetba atema magisterial jenjang nung ken o bushisüngdangtsü aser RG Kar Medical College and Hospital nungi ketdangtsür tejentem kar agintsü takhangba agütsüogo. Parnokisa ken o tembanga bushisüngdangtsü atema Kolkata Police nem August 14 nü tashi mapang atakzüksüogo.

Kasa mapang nung Federation of Resident Doctors’ Association (FORDA)-i iba ken o anema nokdaksü atema ayongzüka sülen Delhi, Maharashtra, Jharkhand aser Rajasthan nunger ajak nung mozüki balala nung inyakba doctor temia longkak aita liasü aser iba ajanga mozükidang service balala nung kongshio.

Sindhu, Sen, Prannoy aser Satwik-Chirag nunger Japan Open nung masayatsü

Luroi/August 13, 2024 (Agencies): India nunger nungtuugu badminton asayar PV Sindhu, Lakshya Sen, HS Prannoy aser tebur tarep asayar Satwiksairaj Rankireddy aser Chirag Shetty nunger ajaki taruba BWF Japan Open nung shilem magitsü telemtetba agiogo. Iba asayamung ya August 24 nü tenzüksü.

Badminton World Federation (BWF)-i Mongolbarnü sangdong ka ajanga, defending champion Axelsen shibai tawa-ang Olympics nung gold medal ka nguogo pa iba asayamung nung shilem agitsü, ta metetdaksüogo. Deobarnü Paris Olympics tembanga sülen taküm iba asayamung nung nungtuugu asayartem aikati shilem magitsü asoshi telemtetba agiogo.

Iba asayamung nung shilem agitsü aliba defending champions asem rongnung Axelsen-a ka lir. Tanga defending champions tem rongnung tetsür tarep asayar Kim So Yeong/Kong Hee Yong na aser tarep temeyoktep asayar Yuta Watanabe/Arisa Higashino nunger densema lir.

Tanga defending champions An Se Young aser Lee Yang/Wang Chi-Lin nungera Japan Open nung masayatsü asoshi telemtetba agiogo. Parnoki taküm

Olympic nung gold medal nguogo.

Olympics nung Lakshya-i India atema bronze medal tera agi dang mangu, kechiyong pa semifinal nung tsükba sülen bronze medal atema asaya nunga takok monguteti liasü.

India nunger asayartem dak alaka iba asayamung nung shilem magitsü atema telemtetba agiba tanga asayartem rongnung Olympic champions Zheng Si Wei/Huang Ya Qiong, Aaron Chia/Soh Wooi Yik, Chen Yu Fei, aser Apriyani Rahayu/Siti Fadia Silva Ramadhanti nunger densema lir.

Asayar tajung aika masayatsü asoshi telemtetba agiaka category ajak nung ano asayar tajung aika densema lir. Tebur kija asaya nung Shi Yu Qi, Jonatan Christie, Anders Antonsen, Kodai Naraoka aser Kunlavut Vitidsarn nunger asayatsü aser tetsür kija asaya nung Tai Tzu Ying, Akane Yamaguchi, Wang Zhi Yi aser Gregoria Mariska Tunjung nunger asayaba angutsü.

Tebur tarep asaya nung world champions Seo Seung Jae/Kang Min Hyuk nata asayatsü aser mezüngbuba Japan Open title abentsü asoshi merangtsü. Tetsür tarep asaya nunga Chiharu Shida/Nami Matsuyama aser Mayu Matsumoto/Wakana Nagahara nunger ajak asayaba angutsü.

BILEMDANGANG
“Nü tebilemba agi masü saka tatishitsü agi alima melenshir.”